



Sud Bosne i Hercegovine
Суд Босне и Херцеговине

Broj: S1 3 IŽ 038623 20 IŽ
Sarajevo, 05.11.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija dr Branka Moraita, kao predsjednika vijeća, Zvezdane Antonović i Srete Crnjaka, kao članova vijeća, odlučujući o žalbi Čerkez Jurice, Put tržnice 2, 21260 Imotski, R Hrvatska, izjavljenoj protiv odluke Centralne izborne komisije Bosne i Hercegovine, broj: 06-1-07-1-1059/20 od 28.10.2020.godine, u nejavnoj sjednici, održanoj dana 05.11.2020.godine, donio je

R J E Š E N J E

Žalba se odbija

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020.godine za Grad Mostar, za ukupno 441 birača po prijavama podnesenim do 06.10.2020.godine iz razloga što uz prijavu nije priložio validan identifikacioni dokument izdat u Bosni i Hercegovini.

Protiv ove odluke žalitelj je blagovremeno uložio žalbu zbog pogrešno utvrđenog činjeničnog stanja po njegovoj prijavi za glasanje izvan BiH koju je poslao putem e-mail od 05.10.2020.godine. Uz žalbu dostavlja fotokopije osobne iskaznice i obrazac prijave za glasanje izvan BiH.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena jer je izjavljena od neovlaštenog lica, odnosno da se odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH, prije donošenja ožalbene odluke, a prilikom razmatranja prijave žalitelja za glasanje izvan BiH-Lokalni izbori 2020.godine za Grad Mostar koja je dostavljena dana 05.10.2020.godine putem e-mail nas.rododoc2015@gmail.com utvrdila da je žalitelj uz

prijavu priložio kopiju osobne iskaznice izdate u R Hrvatskoj, koja nije validan identifikacioni dokument u smislu člana 5.12 stav 4. Izbornog zakona BiH.

Odredba člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), propisuje da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora za Grad Mostar. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Kako žalitelj nije uz prijavu dostavio validan dokaz o identitetu koji bi potvrdio da su ispunjeni uslovi da se u smislu odredbe člana 5.12 stav (4) Izbornog zakona BiH nađe na izvodu iz Centralnog biračkog spiska za glasanje van BiH za Grad Mostar, to je pravilna odluka CIK BiH kojom se odbija njegova prijava za glasanje izvan BiH.

Naime, žalitelj je uz prijavu dostavio kopiju osobne iskaznice R Hrvatske koja ne predstavlja validan dokaz o identitetu, jer se validnim dokazom o identitetu smatra lična karta /osobna iskaznica ili vozačka dozvola ili pasoš/putnovnica izdati u Bosni i Hercegovini.

Posebno se napominje da je iako je žalitelj dana 30.10.2020.godine uz žalbu dostavio fotokopiju lične karte izdate u BiH, njegova prijava se nije mogla prihvatiti jer validan dokaz o identitetu izdat u Bosni i Hercegovini nije dostavljen blagovremeno tj. nije dostavljen do roka koji je odredila CIK BiH nakon raspisivanja izbora za Grad Mostar, a taj rok je do 06.10.2020.godine do 24,00 sata.

Žalitelj je mogao putem info linije CIK BiH da se informiše o statusu njegove prijave za glasanje izvan BiH i na taj način blagovremeno otkloni nedostatak koji se ogleda u činjenici da nije uz prijavu dostavljen validan identifikacioni dokument izdat u Bosni i Hercegovini.

Takođe, žalitelju nije oduzeto biračko pravo za Lokalne izbore 2020.godine, nego samo mogućnost da glasa putem pošte izvan BiH na ovim izborima. Isti će moći glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Predsjednik vijeća
S u d i j a
dr Branko Morait